

Formador ta kere cu den e siman aki mes lo bishita Gobernador cu informacion concreto

ORANJESTAD (AAN): Formador mr. Mike Eman, a declara den entrevista cu Matutino DIARIO, cu durante tur e dianan aki el a hiba consulta riba e tema di e cantidad di ministerionan cu tin mester, pa eherce un mehor maneho.

Formador mr. Eman a subraya cu nan a enfoca hopi riba dos ministerionan, unda cu den gobierno mes pero tambe pafo den comunidad, a constata cu tabata hopi pisa.

E dignatario a referi na e ministerionan di Husticia y Enseñanza cu un solo minister a carga pareu, y

cu gobierno a haya hopi peticion pa separa cada un di e carteranan aki.

E otro ministerio ta finanzanan publico cu for di prome cu eleccion a haya hopi atencion, y cu pa e siguiente añanan e ta sumamente importante, pasobra nos finanzanan hunto cu nos economia tin cu crece.

Aruba mester tin su estabilidad financiero y esaki ta rekeri un atencion hopi specifico di gobierno.

Esaki tabata y ta ainda parti di e evaluacion e dianan aki, tocante reparticion di carteranan.

E dignatario a subraya cu e consultanan a habri oportunidad pa tin nuebe, ocho, siete of menos minister y tur e aspectonan aki a wordo discuti y repasa, y na final e decision mester cay y Gobernador tin cu wordo informa riba esey.

Formador mr. Eman a subraya cu posiblemente den e mesun siman aki Gobernador lo haya su bishita un of mas biaha, pa e wordo informa riba e conclusionnan di contenido y di e ministerionan y kendenan lo ocupa e cargonan.

Formador mr. Eman, papiando awor como lider politico a expresa cu AVP a haya un mandato hopi fuerte di pueblo cu a dune 13 asiento, y pueblo kier mira nan goberna cu e mesun entusiasmo y energia. Esaki ta locual el a busca den e organizacion politico di AVP,

e ambiente y fortaleza pa carga e anjanan nos dilanti cu e mesun optimismo y speranza cu a caracteriza e ultimo cuater anjanan y e participacion di e gremionan cu ta asina esencial y cu ta forma parti di e forza di e proximo gabinete.

Durante lunanan e organizacion politico aki tabata tin consulta cu pueblo y a recoge su sentimentonan y pensamiento, y treciendo tur esaki hunto mr. Eman ta spera di yega na un resultado hopi firme y fuerte, y positivo pa Aruba.